

四庫全書

集部

欽定四庫全書

集部
秋崖集卷
四至
六

詳校官起居注主事臣顧宗泰

主事臣呂雲棟覆勘

總校官進士臣朱 鈐

校對官中書臣高 中

謄錄監生臣施 華

欽定四庫全書

秋崖集卷四

宋方岳撰

詩七言絕句

次韻徐宰集珠溪

瀑煮春風生意長
梅花吹雪入詩香
夜寒記得僧房夢
脩竹半窻雲一床

林和靖墓

結廬舊與青山對，脩竹蕭疎半不存。
惟有亭前古梅在，暗香疎影幾黃昏。

晴夢

塵土侵人懶出門，小窻容我負晴暎。
夢騎瘦馬尋詩去，曾到梅花深雪村。

逢梅

水僊婉弱山樊冗，自我視之兒女曹。
魯直徑令相伯仲，至今未敢廣離騷。

人言草沒孤山冢從此梅花不要詩却是未嫌吾輩在
一枝開過竹巴籬

梅花

竹遶踈籬水遶村一枝無語更黃昏暗香似識騷人意
月澹無風自入門

枯梢橫出竹踈踈挾雪吹香夢自孤立到夜深難着語
怕渠去說與林逋

雪壓橫枝卧淺波三花五葉不須多平生為爾添詩興

今日無詩奈爾何

茅茨烟水隔孤村
雪冷誰敲月下門
只與梅花曾有舊
暗香時肯到窪尊

尋詩

蹇驢踏雪灞橋春
畫出茅茨野水濱
纔見梅花詩便好
梅花却是定詩人

次韻趙尉梅句

冰雪之晨草木屯
南枝亦有未招魂
一愁泥就孤山骨

正恐詩談太不根

疎花不受世間寒得聖之清自可餐今日湖山人已朽
何如茅屋雪中看

雪中

行纏不了醉生涯空宿沙頭賣酒家最是曉寒吟未穩
雪深無面見梅花

次韻李山憲

一船明月秋江冷曾與梅花有約來誰喚雪溪回短棹

寧孤何遜莫孤梅

閒居無與酬答因假庭下三物作諷答

桃諷梅

不肯春風時世粧
歲寒崖谷倚冰霜
人間亦有知香者
盍遣一枝橫出墻

梅謝桃

下欲成蹊春已殘
雨紅猶自有人看
極知不與君同調
但守平生一點酸

梅問竹

一壑烟寒孰與娛
橫斜影對此君懼
風餐雪虐轉強項
惟我與君其是夫

竹答梅

不隨桃李共爭春
猶作踈花向世人
聳壑未妨吾獨步
要看晚節玉璘珣

書趙相公梅卷

一梢兩梢曉灘月
三花五花暮江雪
春風到手眼生寒

烟水村深有茅蕪

次韻酬奚兄

亦笑詩書記姓名到頭為崇若為情漢家禮樂今塵土
不欠當時魯兩生

但得梅花過一冬那須聖酒送文窮揚州不見梅花面
莫是何郎句未工

昭儀春浴

紅薇滴露護輕寒微鬢香絲却玉鸞只道春風庭掖秘

外間已作畫圖看

貴妃夜遊

鳳鞞又上玉花駝
恩在君王一笑中
三十六宮瑤草碧
不知多少恨春風

淨明齋

山徑留雲雨未乾
松聲長共澗聲寒
青鞋莫踏蒼苔破
借與秋厓半日看

次韻菖蒲

瓦盆猶帶澗聲寒亦有詩情几硯間抱石小龍鱗甲老
夜窻雲氣故斑斑

貸錢買牡丹屏

作券西家貸子錢略容書卷識春妍杜陵婦忍長貧面
誇與樵青亦自賢

宿不老山

未必催租能辨詩不妨扶老上烟霏彭仙一去夜壇冷
老鶴不歸雲自飛

借得松風一覺眠
旋燒枯葉煮山泉
人間蟻蛭王侯夢
不到梅花紙帳邊

得祠

十年夢不到清都
雲滿寒簷雪滿顱
一片青山一黃犢
底須更著舊稱呼

其二

石床散髮灑松風
安用黃冠累此翁
但喜太平今有象
漁樵亦在萬幾中

汪運幹餉酒

長鬚手挈一壺酒
問識浣花工部無
簑笠荷鋤烟雨外
再三不信是耕夫

其二

酒吾甚愛徑須醉
快洗平生老瓦盆
中有筆峰能畫我
一牛橫笛過孤村

自嘲

耕雨雖微負郭田
卧雲不用買山錢
春簑健犢寧無語

又寫前銜見集賢

被劾

鹿走山林儘自娛寧知性命繫庖厨一盃羹足為竒貨
野弋山漁何處無

其二

誰將物命作勤渠黃雀頭行萬里餘每為世情三太息
不知吾亦是苞苴

報旱

將軍此腹忍飢慣時事乃爾當何如百骸受病憊甚矣
微此一脉民其魚

猫歎

雪齒霜毛入畫圖食無魚亦飽於兔床頭鼠輩翻盆盞
自向花間捕乳雛

次韻程兄投贈

北里南鄰盡往還那知有客住雲間相過肯作鄉人面
問訊春溪兩岸山

知無燕頷可封侯
索米長安亦強留
輸與鱸肥菰葉滑
吳中風味老孤舟

次韻趙尉

世於吾道轉崎嶇
是與非耶一子虛
借得祁山兩間屋
一間分與月明居

別子才司令

不如意事常八九
可與語人無二三
自識荆門子才甫
夢馳鐵馬戰城南

簡徐宰

雨外茅茨黃葉村老農相語一燈昏
山深未識新官姓但說無人夜打門

自織春簑學治田山寒辛苦不逢年
摩挲此腹何時飽黃犢夕陽相對眠

西山有巖北山薇荷雨鋤烟不療饑
但得縣官如卓魯此言只恐未曾知

俗更相傳作縣難及民那有一分寬
聞君猶逮從諸老

說到民貧鼻亦酸

受誥口號誥詞謂爾岳精習六藝長言詠歌有
風人和平之意

歸我南山老不遭孟亭幾夢赭黃袍強渠枉費平生力
不直君王一字褒

雪寒月瘦鬢成絲綠底天家聖得知從此江山儘驅使
小民奉勅遣吟詩

元英先生家鷓鴣步當文正時其裔孫楷登進

士贈之詩云唐家三百年冠蓋誰有詩書到遠
孫予家自嚴徙徽而譜系遠矣因覽石刻次韻

左方

唐人猶有故家存山裏鸕鷀步下村宗派儻容詩嗣續
橫枝吾亦是兒孫

贈寫照吳生

山須未壓稜層骨詩不能平磊砢胸煩畫雪溪詩意思
梅花蒼石一橫筇

幾人堪畫麒麟閣萬事不如鸚鵡盃只謂故吾詩瘦耳
寒沙鷗鷺莫驚猜

題刊匠圖書冊

黃金漢鼎青錯落綠玉秦璽紅屈蟠龍翔鳳翥入刀筆
寶晉山林風月寒

次韻葉宗丞湘梅

雙娥灑泣凝春竹粉落脂殘不忍粧開作踈花寄幽獨
雪中仍作楚騷香

庾嶺以南非楚產離騷不載亦堪嗟行吟儻見靈均否
且與辛夷定等差

贈談命蘇秦

一蓑牛背飽看山扣角前岡烟雨寒客自縱橫三尺背
與吾烟雨不相干

書手實簿

隨緣常住薄於秋不了鍾魚粥飯頭歎息結繩人遠矣
例教吾負刻藤羞

部索印紙

瀑澗茶烟雪屋燈亂家更入亂雲層老僧今已倦行脚
不用維那喫飯憑

贈算數汪生

十年不讀床頭易山雨鳴蓑為口忙行矣公無落落吾事
水田漠漠正移秧

其二

貂蟬熏業麒麟畫自有夔龍向上人數本不為吾輩設

風烟之白水雲身

堪笑

堪笑平原血濺衣但知忠義未知機命懸鬼貌千秋事
年及懸車自不歸

其二

堪笑蕭生入受遺八年師傅不相知偶離廷尉痴如昨
直等朱游和藥采

其三

堪笑劉安苦學僂雲中雞犬事茫然早知官職乃如許
悔不人間差自賢

其四

堪笑山陽漢鼎移智如文若豈難知定嫌佐命居人後
略識昌言死亦痴

其五

堪笑張華死不休謾精象數古無儔中台星折何曾識
祇識龍泉動斗牛

入閩

山雲底事夜來雨，藏却奇峰不與看。
政說雨中看更好，劃然捲起出晴巒。

雪龍怒吼出山去，二十里雲行上天。
老去極知詩力退，只將日歷記山川。

遊九曲

掀蓬仰看玉崢嶸，借得漁船一日晴。
九曲水窮山雨急，老僊於我豈無情。

鶴怨空山久勒文買船又訪武夷君一聲鐺笛不知處
但覺滿身生白雲

莫問神僊定有無地靈斷不着凡夫我來便覺芒鞋好
飛上前山不用扶

又和晦翁權歌

燒藥爐存草亦靈煮茶竈冷水猶清老僊一去無消息
只有飛泉落珮聲

桃花認得捕魚船醉着歸來月滿川山鬼已磨蒼玉碧

要留名字與風烟

家在清溪第幾峯
誰搴薜荔採芙蓉
漁歌未斷忽歸去
翠壁一重雲一重

羣仙曾此醉
酖船插向蒼厓不記年
蕙帳夜寒聞鶴語
人民城郭自堪憐

宿雨留雲被半巖
晴光飄散雪毵毵
沾衣不識骨輕重
下有老龍無底潭

竹遶寒棲蘚徑深
莖莖手種玉成林
翠屏向晚無人對

猶識先生一寸心

又撐小艇過前灣竹外庵居晝掩關桃李無言開未了
春風元自不曾閒

雲氣藏山雪捲灘地靈不與俗人看一篙略借秋崖便
九曲欲窮山雨寒

莫說山窮山勢開匆匆急棹酒船回溪山欲盡興無盡
撐入白雲深處來

乘興而來亦偶然誰將陰壑作晴川笋輿更問星村路

去看溪南一線天

次韻方教采芹亭

手劬風烟不占多
春來物物是陽和
極知山與詩為地
老去無詩奈若何

亭與樵嵐一樣新
詩書不受世間塵
清風明月來無盡
不在溪山只在人

竹外清溪溪外峯
誰搴薜荔采芙蓉
所思渺渺隔何許
我欲從之騎九龍

終日看山自一奇
寒溪更與月相宜
采芹人去夜岑寂
政是先生得意時

莫問秋風八月槎
一簑欲老水之涯
筆床茶竈肯同住
畢竟吾宗是作家

客懷老去向誰開
白雪莖莖不用栽
只有愛書餘習在
待攜殘藁過溪來

默坐焚香儘自佳
莫隨俗眼亂空花
古今人物不相及
元只中間隔一些

山自西來玉作層千峯住處一溪縈宜晴宜雨乍明滅
不是老天無十成

山是烏山落一支徑煩詩眼相亭基舞雩人在春風裏
清坐不言山更奇

研朱滴露月三更見說羣書作堵環君自苦於經傳癖
不如借我去看山

次韻宋尚書山居

日涉園

老石山苔手自治愛閒詩最與山宜園官莫惜頻來往
破費春風又幾時

虛靜堂

世事鷗忘句肯早雲深料理舊花枝了無一鳥傳幽意
只對青山自解頤

息齋

塵途長逐衆人忙不抵齋扉一枕涼世路巉嶇吾倦至
底須辛苦為膏粱

見南山亭

能令詩腹化神奇香到黃花秋力微我醉悠然山亦醉
竹深啼鳥自忘機

賦梅堂

夜草春牋奏玉皇橫波曾識水曹郎硯香留得東風在
一吐兔崔冰雪腸

韓然堂

心亦元如止水淵斷無塵想到諸賢左蝸不斷追韓夢

說與青山恐未然

亦樂堂

分得雲山老一瓢
夢寒不記紫宸朝
無人畫出閒中味
吟入梅花雪迢迢

醉陶軒

時復中之興已高
是非一付與春醪
向來醉眼略四海
粗記柴桑人姓陶

題鄭尉愛山樓

青山不入俗士眼誰肯着樓招喚渠徑草不鋤花又老
一簾新雨了殘書

其二

三間屋與佛同住紙帳梅花烟雨寒有客肯來清話否
上樓借與好山看

雨中

春泥得雨滑於鏡曉樹帶雲淡似圖只作尋詩看便了
梅花曾識灞橋驢

別湯卿不值

雲深只以竹為墻
新雨纔乾
逕草長
野鶴已隨溪客遠
一方玄玉帶詩香

將入僊都

客如我亦未為俗
着我於中何忝渠
苦作春陰愁又絕
蕙花香冷雨踈踈

洞元觀

窻林綠氣冷香爨
山帶斜暉半入溪
幽鳥似嫌人至數

瞥然飛過隔林啼

過縉雲胡君作茶古松叢蘭中

十丈蒼皮帶雪僵山雲歸晚泊書床不綠曾讀離騷熟
蘭亦欺人未肯香

飲茶蘼花下招蔡公慶

春工管不了霓裳風自南來占取香一夜謝池晴雪滿
無人說與蔡中郎

次韻酬清脩老

玉堂老作清脩記曾許渠為我輩人
髣髴三生虎溪笑
偶然一見面如春

過楚道人舍

紛紛俗子俗到骨對面有山那得看
不料楚髯能辨此
夜深月冷石闌干

平生詩友劉賓客醉墨曾傳到雪廬
然說竹溪茅屋好
便能詩亦不如渠

次韻清脩老墨梅新茗

此詩合讓簡齋老盡洗世間聲色塵我更鑿空難着語
寒驢粗記雪橋春

次韻宋尚書山居十五詠

駐屐亭

等得輕晴便一來逢花不住等花猜丁寧莫掛枕柳去
怕損亭前稱意苔

金沙茶蘼徑

露浥晴光對洗粧柔條無力不成行阿環淡竚阿嬌麗

一種風流各自香

竹徑

此君老去更風猷
冰雪生寒我輩流
穿徑略容携客共
交情疇昔雅相投

清音亭

淨洗從前兩耳埃
溪聲併逐雨聲來
此竒賴有詩能領
一笑鍾期安在哉

海棠徑

酒瀉銀壺莫近傍怕驚花睡損殘粧擬題報答春風句
也恐春風未敢當

爛柯臺

玉行敲斷欲生塵翻手那知局面新到了不妨饒一着
旁觀自有識機人

茶巖

壑底雲香不等雷便携石鼎與俱來鶉鳩喚得西溪雨
頓得春從齒頰回

見一菴

有山如此且深登等一逍遙鷄與鵬只作住菴看便了
華陽銜亦不須稱

卧雲庵

半塢雲侵蘚石床向來憂樂已俱忘墻西有竹曾留鶴
夢亦相携入帝鄉

梅坡

風雪灞橋籬落間寒驢乘興寄曾攀三生習氣除難盡

也許渠分一半山

木瓜塢

與山作計未為踈儘有奇功可屢書但得相尋雙脚健
不須論報計瓊琚

見溪亭

碧壺時與故人提山帶僧鐘日去西深不知寒雙路鳥浴
雪灘烟重碎玻璃

正已亭

少日橫刀屬兩鞬
玉花曾幾試戎韉
歸來聊復觀仁耳
不在驚鴻落勁弦

紫陽閣

隔岸烟雲一望間
夜深笙鶴與俱還
不緣曾識謫僊面
未必烟雲住此山

東齋

佳木扶疎漏曉曛
書床留得夜來雲
幽經談盡無功課
自理東窓芝朮熏

記客語

蒲萄斗酒自堪醉何用苦博西涼州使我堆錢一百屋
醉倒春風不掉頭

其二

孀婆闖節入書館政可倨坐令庭叅吾曹致身苟如此
九淵驪頷令誰探

次韻趙僉為趙宰畫野山多於地春山半是雲
蓋宰之尊公詩也

竹屋無人肯見過寒雲自傍釣船多老僊更在雲深處
奈此春山野水何

賣花翁

不論袍紫與鞵紅一朶千金費化工人共醉花花亦醉
莫教山圃不春風

汪聖權自開壽域作小亭其前植桂環之謁予
作扁有詩云不分桂籍一毫月在踏槐花十八
秋其志亦其悲也已為題曰桂穴而系之詩

老蠶作繭自纏裹不肯生前只麼休却後百年牢記取
滿身明月桂花秋

其二

白頭不了秋風債桂穴鋤雲種一枝舉世今迷日五色
莫教地下有人知

獨立

村夫子挾兔園冊教得黃鸝解讀書能記蒙求中一句
百般嬌姘可憐渠

從來人說天難做，纔怨春陰又怨晴。
昨夜雷驅三尺水，更愁橋斷不通行。

贈談命者趙生自號千兩金

人間萬事一盃酒，之子五行千兩金。
聽我自窮詩自老，半江明月葦花深。

至日

至日觀書不幾行，梅梢橫影月昏黃。
漢家紅影無人見，未必曾添一線長。

梅花十絕

儘道春風有等差
從前謾語待詩家
今年雪屋親曾見
的當南枝先着花

日日尋梅未肯春
幾番和月倚吟身
一枝斜入叢篁裏
人不見渠渠見人

自有詩來幾許詩
玉堂吹徹又茅茨
阿誰不愛梅花白
未省梅花愛阿誰

是處溪橋淺帶流
山中別有一深幽
規模略比林君復

開上風烟頂顛頭

自插斜枝墊角巾詩狂又有老精神
黃昏酒醒欲歸去
月出山來喚住人

老樹生苔凍欲枯山邛雪意晚模糊
一梢橫打竹邊過
造化工成水墨圖

逋僊解道影南斜二百年來茂以加
別有脫胎詩一句
自從梅後更無花

三分香有七分清月冷霜寒太瘦生
山澤之儒君識否

樂天姓氏謫僂名

有梅無雪不精神有雪無詩俗了人
薄暮詩成天又雪
與梅併作十分春

竹緣貨殖比封君松愛微官不避秦
至竟羞與噲等伍
歲寒誰障庾公塵

即事

野外孤橫雪外枝歲寒了不受春知
世間所謂奇男子
除却梅花更是誰

荒烟疎樹野人家竹外尋詩一逕斜山鳥亦知人意思
忽翻殘雪啄梅花

二月朔日食陰雨不見

飛飛細雨濕花朝不省陽烏影動搖晚色漏晴山又紫
始知陰沴已潛消

苦雨

稼欲登場只等晴入倉方始是收成雨須小住為佳耳
已約鄰翁話太平

其二

翁自無田望有秋有秋翁自飽
勦勦此愁不遣吾人管
欲遣何人管此愁

除夜

日月無根走彈丸年來年去幾
椒盤秋崖老却渾閒事
老却梅花不耐寒

其二

莫嫌工部太侵尋
老杜稱呼直到今
但我六年應改口

不知老杜更年深

其三

春缸落面滑於油旋潑醅來不用芻窮鬼相隨政相熟
莫題茶壘惱渠休

其四

山中寒盡不知年只道梅花欲雪天未到五更春已動
乾坤生意本無邊

其五

不是催租夜打門那知寶祐改新元人間測度春風意
李白桃紅又一番

其六

盡處生機袞袞新花情柳思已精神歲堂堂去誰能守
睡到明朝又是春

立春日雷

勝裏春從午夜回自挑生菜壓春醅阿香不解人間事
便駕雷車送雨來

出地奔霆便發聲
寒花衰草亦欣榮
天公只要新羣聽
不等春來蟄已驚

獨立

茅茨烟樹水溶溶
籬落人家帶晚春
獨立西風無一事
自撐短艇看芙蓉

悼栖霞主人

羽士巖前烟樹深
亂雲堆屋自無心
鶴驚蕙帳夜岑寂
霜月正寒愁不禁

山居七詠

經史閣

買書堆屋當藏珍
硯水生春玉作麟
此老大蒙稽古力
至今疎草墨花新

省齋

聖處終難舉
似人二三子
在最情親於中
檢點平生看
香縷縈簾眇此身

中隱洞

終南少室苦躋攀，已入先生一笑間。
不學劉安便仙去，屋邊儘自有佳山。

丹桂軒

何年進入玉華宮，香到君王紫禁楓。
月府歸來衫袖冷，蟾蜍滴露洗秋紅。

乳泉

正爾清寒與世殊，地靈不受柳詩愚。
晝長何似醒幽夢，碧玉壺深貯雪腴。

瑞萱堂

攜得春歸通德門等閒萬木亦霑恩
母桃未熟蓬萊淺
連夜吹開堂北萱

湛然亭

一念惟餘睡作魔
鷗閒不與世同波
邇來定力空諸妄
如以摩尼照濁河

趙僉見過不值有詩次韻

草廬不慣高軒過
莫怪樵青久未磨
一片斷雲尋宿處

有詩誰與錄侯鯖

其二

向來曾管重湖月五老當門但讀書見說邦人猶感慨
恨予不學藺相如

湖山紀遊

兩山南北詩三百付與秋風趙倚樓忽憶老逋墳下路
梅花夜雪上孤舟

其二

鳳凰城裏花如海，選集諸人守部門。此老久漁雙脚浪，
崑烟湖霧又黃昏。

次韻趙端明萬花園

萬花錦繡同民樂，不比青山獨樂園。辦得春風共花醉，
儘教蝶鬧與蜂喧。

其二

和氣能消塞上寒，却於邊事頗相干。酒旗歌鼓秋天外，
新綠柔紅又幾般。

其三

風逗湘簾雪絮飛
池痕雨過麴塵肥
揚州十里春猶在
細柳營深解鐵衣

其四

玉簫吹斷知何許
柳徑日長嬌燕舞
鶴城半掩人未歸
數點春愁杏花雨

贈相士

老來學劍已無成
眼底邊塵碎未清
此輩東之高閣耳

且容黃犢伴春耕

雪中觀梅

落盡梅花合一杯
雪深無復舊莓苔
山谿莫遣人行破
安得酒從天上來

月中觀梅

何物蒼頭不自量
踏梅踏月上山堂
月明幸是無痕跡
可惜瓊瑤一徑香

病中

折鐺破釜底堪脩縱使脩成已不侔誰與吾身自珍重
暮年藥籠漫勞收

觀池中鷓鴣逐其自外來者

久住成家不見猜傍船水暖逐毳毳岸沙能占春多少
長恐諸侯客子來

有歎

月如此好吳牛喘雪不勝寒蜀犬猶莫怪叔孫并祿父
不知周孔是何人

小醉

日淡風恬獨倚筇
一池草色自溶溶
我猶未醉春先醉
政不關渠琥珀濃

秋崖集卷四

欽定四庫全書

秋崖集卷五

宋 方岳 撰

詩 五言律體

挽曹侍郎

諸老各凋零公乎獨典刑
草堂春得句雪戶夜談經
歲月頭從白江山眼共青
斯文今已矣天亦自冥冥

一角玉麟寒何心獬豸冠
滿腔秋沆瀣披腹玉琅玕
講

入經三昧書成義不刊陽城遺碣在老淚不勝彈

筆橐上嚴宸真為侍從臣袖中周禮在言外孔堂春亟
草間居賦寧慙勇退人空餘文作塚書帶已成塵

我昔識平川初鳴偃室絃議題春雨夜探榜晚秋天兩
柳今安在枯梅畫不傳向來詩酒地獨立意茫然

先生宰吾鄉時相期甚至秋闈徹棘步至南門橋
接榜而某適黜於有司良負盛心縣有兩柳一梅
特奇先生歎賞不已以為行半天下不嘗見也今

皆戕矣有懷角弓之什歎息久之

齋宿學宮

竹外一燈青殘書伴古廳葉乾聞雨急山近覺嵐腥多
病身為累無心夢亦靈明朝有癡事須到采芹亭

山居十首

我愛山居好林梢一片晴野烟禽諍語春水柳閒情
石隨行枕藤花醒酒羹吾詩不堪煮亦足了吾生

右一

我愛山居好紅稠處處花雲粘居士屨藤覆野人家入
饌春燒筍分燈夜作茶無人共襟抱烟雨話桑麻

右二

我愛山居好閒吟樹倚身田園無事日天地自由人野
外窮三逕山苗草八珍醉歸渾不記黃犢自知津

右三

我愛山居好林霏曉未開龍蛇松薜荔虎兕石莓苔太
古雲猶在常時雨亦來暝巖眠處冷不記到蓬萊

右四

我愛山居好堆砌忽坐忘
草塘銀潑刺庵戶鐵琅璫
只道雲藏塢那知市隔牆
人嫌吾寂寞吾亦笑人忙

右五

我愛山居好躋攀繚暝烟
偃松祇可坐橫石劣容眠
菊徑重陽酒梅花雪後天
一筇吾事足與世自無緣

右六

我愛山居好乾坤自一丘
牡丹新富貴楊柳舊風流
婦

喜醅新熟兒誇麥有秋
人生行樂耳身外更何求

右七

我愛山居好新篁欲上竿
草蕃侵路狹地濶占雲寬
山響棊聲濕堂深樹影寒
柴門底須掩非意不相干

右八

我愛山居好遙岑碧四圍
雲沈平釣石草蔓亞樵扉
野水喧姑惡春陰怨姊歸
坐來還失笑吾道是耶非

右九

我愛山居好畦蔬手自耘鳥聲穿戶過鶴唳隔村聞石溜渾如雨溪船盡是雲煩君謝逋客不用北山文

右十

意行

小約通幽徑半山生夕陰鳥聲花外急春意柳邊深人事雲無定吾生日已沈不知松作麼也換去年心

送章監丞守廣信

近世無佳郡中朝第一公再三疑壞症第一是貪風野

雪深耕耒春苔蝕
鋤筒龔黃只如此
為問玉山翁
勇去何為者尋盟
何可人雁聲
江國曉梅蕊
雪籬春同
舍誰如子為州
獨有親月巖
吟處碧物物
是吾仁

社日次韻

社日神林鼓豐年
處處祈水痕
深浸穀野燒
暖生薇農
務相尋急吾詩
不療飢夜長
間扣角亦喜
飯牛肥

又

邂逅治顰酒春風
免破除燕來雙
鬢雪花覆一床
書野

碓生茨草山孟飽飯蔬宰平無此手自覺老懷紆

五月初四大水

山雲一夜雨溪漲疾於飛小市通為壑幽居半及扉木
披龍有迹牆斷鶴無歸書帙方狼籍誰看舊釣磯

不寐

不寐何為者幽居事更稠怯風思鶴冷聞雨為花愁草
合妨遊屐沙崩壓釣舟春蓑故無恙歌枕數更籌

其二

不寐何為者閒人最號忙釀方傳得法詩未足成章藥
草霜多損寒蔬雨半荒幸無天下責夔高在巖廊

次韻林同年

歲月半行李與君荆蔓間十年場屋夢何日道家山征
棹江千里雲壇月一間豈無經濟意生世政多難

次韻話別

一雨桐江滑佳哉月一篷歸猶慙怨鶴悔不蚤冥鴻涉
世書無用尋山酒有功諸人如見問貧耳却非窮

程伯茂尊公挽詩

雨昏先友記猶復有斯人周易相傳授唐衫自隱淪翳
桑秋廩共結草夜臺春為酌月塘月何年琢石麟

知瑞州羅大夫挽詩

汙俗狂瀾倒公平今獨賢折腰慙為米絕口不言錢筆
索名臣後簞瓢素士先只消廉吏字題作墓門鐫

用趙尉韻寄題約山樓

可人期不至樓外有佳山幾點寒林畫一簾秋水環只

煩詩五字相與月三間貴賤交情薄何妨自往還

阻風

佳處何妨住江晴倚落暉野船穿樹過沙鳥帶雲飛寺
有唐碑古山羞漢鼎非長安多過客留墨滿苔磯

知郡陳告院挽詩

舊隱真僊宅論詩得老干雲沈海屋古書擁雪燈殘一
棹橫秋色九華生暮寒空餘青眼在肯作故人看

次韻酬戴式之

山房秋蘚滑吾亦為詩來家遠雁初到邊寒菊未開貧
知心事古老覺鬢毛催能共清談否呼童急洗杯

再用韻約式之

已掃秋庭月蹇驢來未來一官連我俗雙眼向誰開書
癖工為崇詩窮不受催是中惟酒可到手莫停杯

寄姪

爾亦為貧驅窻間硯欲枯自從村墅別曾到陝山無寒
圃應肥菜秋霖怕損租有書供夜讀時一喚吾雛

送呂提幹併簡謝泉

山雲一夜雨穩放過閩船坑發寧遺壙民貧不為錢范
碑秋寺古楚觀暮江前寄謝東山老靈砂併欲僊

送劉子範倅宜春

一念到吾親人間萬事輕鄰州纔半刺行李只諸生問
路重陽雨迎家兩日程笑談燈火夜邊雁自秋聲

送應武諭倅廬陵

乞倅廬陵郡予為第一人天慳終未肯人好自相親諸

老詩書在平園草木春
鷗朋嘲薄分山屐蝕京塵

敬亭道中

小謝曾臨郡山應自識
詩空餘春草夢無復敬亭碑
暝色如相覓秋雲不受吹
買魚尋宿處烟水有茅茨

宿奉聖寺下

幽事隨人撰茲行亦屢逢
飯多依釣艇宿喜近僧鐘
野水連秋暝溪烟急晚春
誠齋題石老細讀得從容

舟次當塗

一似餘杭路寒洲半是蘆客依秋泊岸漁帶晚收風遠
樹齊於薺平蕪雜以鳧可憐沙上月相見又當塗

七夕鄭文振席上姬有楚雲者為作三弄

帝子經年別秋風遠客情斷雲含宿雨古木落寒聲河
漢低逾潤江湖夜未平巫雲莫吹笛吾意正淒清

次韻王尉

雪屋誰堪語惟愁鶴共居夢靈山有分門冷客無書詩
豈於人癖吾元與世踈窮知書作崇牽率費春鋤

寄湯卿

書冊依官屋何如自在身且無山得看猶有竹相鄰性
野回書懶詩癡易藁頻便歸吾已俗徃徃白鷗嗔

舟次嚴陵

人語山相應舟行岸自移魚因寒越雋鷺到晚猶飢歲
盡難為客江晴易得詩渺予烟水濶何以此行為

與雁分洲宿連雲做夢清江風人事老夜雨客心驚潮
急仍吞瀨更寒不過城子陵吾所題叢外底須名

送別史僉

二月寒如此君胡不少留夕陽隨水去春草泥人愁江
上三年別詩邊兩鬢秋折腰貧尚爾天地一扁舟

熱甚有懷山間

終是山間別寒泉在脚邊戲魚爭美蔭啼鳥破佳眠山
寂夜如水僧閒日抵年欲來來未得肩斗救枯田

寄魯山兄

搖落山城暮行人返照邊亂蟬鳴古柳獨鶴下遙川秋

事無多日寒花又一年故應深夜雨重憶對床眠

次韻王尉天寧晚飯

借得山房住清溪帶晚林雲應隨鶴宿詩亦對僧吟
杯滑知能雋窓深苦易陰劇知歸思浩吾亦識琴心

煮茶

瀑近春風濕松花滿石壇不知茶鼎沸但覺雨聲寒
山好僧吟久雲深鶴睡寬詩成不須寫怕有俗人看

猿

三峽巴江水何年離爾羣艱難俱未免清切不堪聞羈
旅仍春浦愁懷况暮雲尚思靈澗冷蘿蔦月紛紛

解榻

解榻留雲宿山居事事幽長貧吾道在多病此生浮野
色連溪暝蟲聲滿院秋那知一丁字蚤白十年頭

聽雨

竹齋眠聽雨夢裏長青苔門寂山相對身閒鳥不猜客
應嫌酒盡花却為詩開莫下簾尤好恐妨雲往來

初秋

殘暑何時退
秋風日夜生
已嫌湘簟冷
稍覺楚天清
山路晴猶濕
星河夜自明
時聞梧葉落
一似打門聲

晚興

山淡長疑雨
看山自撚髭
暝雲延晚迳
秋蔓亞疎籬
院靜涼於水
人間瘦似詩
移床眠對竹
莫與俗人知

送子用弟遊學番禺

頓覺溪流滑
番湖草欲春
船輕攜硯易
家近寄書頻
山

雨同離別寒窓自寵珍
但於燈火夜報子倚門親

唐律十首

雲木上蒼冥行藏只草亭
雁隨秋到早山入市來青
投老餘漁具能詩例鶴形
髮根風露入肺渴喜初醒

盡日此徘徊青粘兩屨苔
鳥聲穿戶去暝色過溪來
象齒剗鞭茁銀刀罾繪材
空山人自老醉眼向誰開

有客共攢眉蠶叢事可悲
渡瀘諸葛表哀汴老韓詩
誰又青冥鉞吾方白接離
神謨自堅定豺虎莫恫疑

松露滴深幽山寒草逕秋蔓藤行伏兔野竹上牽牛日
月雙車轂乾坤一傳郵功名成底事何苦覓封侯

捲雨對遙岑詩寒不自禁猿猴三徑小虎豹九關深道
眼虛空界間身自在心荷鋤今亦倦年與病相尋

老去脚猶輕吟邊不杖行孤亭深野色高木易秋聲歲
事纔中熟山居亦太平不辭遭泥飲謹勿殺能鳴

經月魃為妖連宵雨似潮山田禾側耳野漲樹平腰古
語天難做民生日不聊忍飢吾亦慣古色一簞瓢

寂寞斷過從行山又一重烟村秋色畫茅屋夕陽春得
句多題竹觀書半倚松心閒身已老悔不早歸農

谷口豈其卿胡然朝市爭遠山長晚色幽鳥乍春聲老
覺人情薄聞於世累輕早紅香可飯何必又魚羹

吾亦愛吾貧樵山採墮薪百年雙短鬢九職一閒民秋
蔓茶僧老春泓酒母淳兩生誰可致此外不關身

挽彭制機

場屋崢嶸氣雖平豈易干江湖雙鬢古師友一燈寒戍

析猶傳檄漁烟自釣竿極知書有種吾道未凋殘

山中亦云樂蔬甲手耘芟面熟鳥窺戶眼生雲穴巖樹
蟠根可坐路礙石休劔每笑陶弘景猶將隱結銜

簡杜子昕節邠

買屋湖邊住湖光入酒卮向來多說劔老去只耽詩時
序寬衣帶年華上鬢絲肯收湖海氣了事覺兒知

出關

江雨正冥冥江鷗聚晚汀雲深城闕麗潮落海門青宇

宙雙蓬鬢江湖幾驛亭不須關卒邏吾亦厭銅腥

泊歙浦

此路難為別丹楓似去年人行秋色裏雁落客愁邊霜
月歌寒渚江聲驚夜船孤城吹角處獨立渺風烟

重陽

古岸維舟夜蕭蕭秋葉丹野烟連竹暗江雨灑燈寒亦
喜重陽健誰知行路難吾親應念我更把菊花看

九日

逢人提菊賣方省是重陽山曉雨初霽江秋樹亦涼年
華猶故我烽火更殊鄉有客那無酒令人憶草堂

秋曉登山

發興在丘林其如老見尋身餘持蟹手脚負看山心秋
色蒼厓暝曉籬黃葉深惟應負苓者來往古松陰

蘭溪晚泊

岸岸蘆花白空江多月明一簾秋色老千里暮雲平寒
入霜前韭香傳雨後橙煩詩題品看此酒舊知名

八詠樓

郡古低臨水城荒早閉門岸沙分路細江雨帶雲昏山
豈緣詩瘦樓應厭市喧前朝碑尚在半已蝕苔痕

次韻趙尉

括山隨處好况復有詩人粘壁多詩藁看山少訟塵夜
寒琴伴月香冷硯生春鶴亦能留客敲門不厭頻

次韻陳湯卿

括蒼烟雨頂客木晚嶺玩家遠書難到雲深夢亦寒僧

邀携茗試客許借詩看琴冷梅花月何時為一彈

其二

野迳漁樵共霜寒江上村亂山橫紫翠孤笛送黃昏滿
壁題詩暗連牆貰酒渾往來今已熟稚子又鷹門

次梁倅錄囚上饒

此老清如許寧求使節知微分風憲重山到月巖竒秋
色深宜雨寒花併入詩聖朝本仁厚鼠輩亦吾兒

陳帳管尊公挽詩

不獨於書癖論邊語亦奇丘園身竟老場屋世誰知客
下陳蕃榻人傳竇諫碑九華山翠外煙草正離離

道中連雨

老屋村春急歸鴉半暝煙斷厓留宿雨野水沒春田昨
夢山須記幽情鳥不傳也知晴更好草木已爭妍

其二

蚤晏逢人問荒村店亦稀竹輿穿雨過沙鳥帶雲飛野
渡疑無樹春山儘有薇不緣詩是伴誰與倚荆扉

其三

塵蝕貂裘敝吾生奈爾何雷聲春蟄怒山意暮寒多窮
不彈長鈇歸應負短策自知機事淺或可共鷗波

次韻汪少卿贈別

一詩傳戟外春亦肯隨行老不論圭瓚寒於嚼水晶夢
驚池草合香泛墨花輕立盡沙頭月鷗清睡不成

次韻訓其父

心事一鷗輕郵籤夜卜程春寒眼對雨別久語連明硯

有詩能秀山於夢亦清歛溪多老石一一待題名

再用汪卿韻

畢竟春晴好楊花也送行驛程寒冉冉江樹曉晶晶水
長船能駛詩多擔轉輕江湖吾倦矣茅屋幾時成

次韻別元可

帆帶春風夢鷗知遠客心暮愁隨雨做逸興與江深書
不厭頻讀詩須放淡吟絕憐寒食酒與子不同斟

次韻趙尉

昨過騎驢尉香深茗一杯杏寒春且住芹老燕初來山
自相知甚僂今安在哉晚洲分鷺宿了不受嫌猜

送別薛丞

肯為祁山住晴浮草木春溪晴隨硯轉心遠與鷗親幾
佐弦歌舊寧矜矧刃新蕭規元好在傳語憇棠人

其二

題遍南牆玉與春相伴歸花明晴岸濶帆轉暮江肥鷗
老催紅藥雲香近紫微檣竿兩燕子也帶笑聲飛

灼艾

人生不滿百憂患况中年
藜藿工為祟參苓那得錢
不虞波及晋聊復火攻燕
一笑遭秦厄殘書累腹便

次韻程兄見寄

舊日曾來處廳寒雲月閒
坐忘無局務起晏不朝班
昔竹關幽事湖山怪老顏
一生憂治世今轉覺多艱

被盜

鼠輩真成誤吾塘底用穿
近詩貧有藁舊物冷無氈
輦

路沈秋折干擲老禁塹故應萑葦外薄暮不堪船

山墅

竹逕裏茅茨荒烟晚未炊醅禽爭灌木吠犬守巴籬涉
世終於拙歸田已自遲老親頭白盡眠雨話吾私

其二

山沍雪雲低荒蕪略有蹊逢人多說虎隔塢忽聞雞寒
剖蜂房戶晴分麥町畦邇來神亦健薄飯厭羹藜

其三

且莫嫌窮僻山居儘自竒
候樵分玉草熏穴得香狸杯
雋明冰片崖寒孕雪芝不遺
吾一美慙爾野人為

其四

近况居然野稱呼只豎民
有詩供課最無債惱比鄰性
亦無嫌懶人多不解貧
每過田父宿吾自認吾真

其五

牛背夕陽暖沙頭霜葉寒
酒生寧可薄橘老尚多酸
友昔幾相賣山吾素所歡
牆陰有茅茨留得菊花看

趙尉催築秋崖

只爾三間屋吾貧未易云與山先定諡有客屢移文竹
喜今年活梅從隔塢聞猶嫌灌園力多為讀書分

送王尉歸覲

喜有吟詩癖吾儕得往還客惟依竹語官只似僧閒夜
雨燈誰共秋厓藁未刪柴門黃葉下別後正須闌

其二

不以登朝急歸歟有母慈新炊甘野齋秋思老江蘼薄

宦惟琴在孤征與月隨
幾時湖上去吾欲報鷗知

次韻縣圃卽事

鳧鴨能閒暇相依睡淺波
海棠經雨過楊柳受春多
未必詩窮在其如酒病何
閑門春草長吾亦斷經過

阻雪

客飯江豚美仍須滯此留
竹深通酒舍沙冷歇漁舟
專與詩為地明將雪作愁
此行乘興耳吾亦儘風猷

其二

風烟兩不借此嶺復南崗陰石無霜滑寒梅未雪香逢
山貪看畫得句不成章月下門須掩多應說短長

其三

猶及乾淳舊廬山一老儒典墳行楚蜀科目不臯夔秋
迥人何在江空樹欲無重陽風雨近誰與東生芻

題宋氏小赤壁

自有梅花賦何煩苦覓詩鶴能嗔客俗山亦忌人痴岸
斷流春急峰高吐月遲吾詩不須刻萬一老坡知

題湯郎中玉峽

平壁蒼崖破晴空雪溜湍雙湫嵐氣重一派雨聲寒自
有雲相伴只消僧共看括芽春可煮移鼎對巘

離括日子安湯卿子貫同宿天寧

數月蒼州住山猶有故情雨如知去日詩亦了行程官
柳因寒損僧茶帶雪清怕無書信便一夜語連明

次嚴陵

二月寒如此楊花不受春路生尋店早家近夢歸頻白

鳥無塵事青山自故人幾時茅屋下卜與爾為鄰

入歛

野竹吾鄉路逢人似故知社寒催燕早夜雨勒花遲草
入思連夢山邀到歛詩客中春一半煞是負春曩

到家

路遠都無信燈花亦未知晴看寒食近歸及牡丹時親
却俱差健兒猶不解痴在家貧亦好雪夢幾相思

寄曹雲臺

尚記梅花否相看只有君肯辜清夜夢去管華山雲帆
到知何日詩今瘦幾分惟應問安處曉角月中聞

其二

難得宜春便經時不報書雨多花較損雪盡草頻鋤燈
火貧如故山林拙未除有詩無話處一向閉門居

訪僧

夏氣仍清美踈林綠未交舊移花亞竹新乳鳥爭巢池
地多宜箭山寮只蓋茅每思分一榻從客借書抄

次韻王尉致香

客有知吾癖能分一雪涼只將詩意思自與夢商量竹
密雨聲雋意深山意長研朱對周易老鼎亦英揚

挽嬾庵處士

萬事從吾嬾庵居隱者家酒深牽率月詩辦事治花健
犢閒耕具輕鷗憶釣槎歸來誰晤語野艇渡寒沙

漫題

投老自山林灰寒寸寸心鶴眠漁屋小僧語雪籬深夜

讀貧如昨春犁懶到今松根有蒼石抱膝一長吟

次韻羅制幹投贈

中秋明日是雨色半蒼厓無月可吾子有詩傾老懷
人間碁局面身外酒生涯莫及邊頭事誰知濁與淮

送石孫赴童科

聖澤被卷阿髻童亦置科兩蝸從小競三豕至今訛亦
漫為官耳其將奈若何豈關門戶事翁已老漁蓑

澆花

籬落花無賴春寒手自治但留根本在終有發生時
雨露曾何擇山林未易移吾知勤抱甕一任化工為

徐仁伯侍郎挽詩

諸老遺書在情親獨考亭學卑時俗陋文起衆人醒
壯筆扛周鼎危言聳漢庭羣公俱避易吾道未凋零
綸綍泥封璽蓬萊月鎖廳冰霜寒挺操霄漢倦梳翎有碣留
南劍無心徙北溟一襟梅野雪半世草堂星晚對螭坳
墨親探虎穴猩豹闕傳曉蹕蟄戶動春霆彼相墮人紀

臣言準老經綱常通宇宙機阱駭朝廷躔宿驚宵隕乾
坤為晝宜囊封爭論切詔勅費丁寧憤極空流涕時平
竟失刑憶曾歌楚些忍復吊湘靈光蝕星奎壁冤沈古
鼎劔茫茫千載恨不盡月巖青

新晴

久雨村仍暝新晴物自欣蝶翎穿戶過禽哢隔溪聞野
徑忙穿屐山泥儘濺屨柳垂春寂寂花落雪紛紛半月
風雷電四郊烟水雲畫圖寒不捲林壑遠難分好在魚

蝦侶甘同鳥獸羣塢深藏曲折竈冷鬱氛氲野碓多春
藥山庖少膳葷瓶儲徵士粟澗煮野人芹美可冰瓠茹
香惟瓦甌醺鷹芽長一寸貓笋重兼斤淡泊諳貧味素
微策睡勲意行隨遠近高卧送朝曛原隰桑麻沃衡門
卉木薰隱居捐世累處士應星文詩憶春池草書忘秘
閣芸桐孫涵古色柏子吐奇芬載籍悲千古枰棋愍兩
軍烏藤同寢飯黃犢了耕耘目為蠅頭眩肱綠鸛觜駝
一科曾不補四體正須勤陋巷瓢供飲文窮硯待焚剛

卷五
賜猶木彊皴面自靴紋夜帳猿孤憤山籬犬怒狺怪哉
空復咄老矣尚何云我亦輕餘子人誰愛此君避喧方
匿影走俗枉勞筋日月雙飛鳥江湖一聚蚊相攜聊醉
去酒不到劉墳

秋崖集卷五

欽定四庫全書

秋崖集卷六

宋 方岳 撰

詩 七言律體

次韻秋崖落成

高亭着處出竒峰不枉平生此興濃
力士錯隨狂李白華陽巾墊郭林宗
菊花籬落秋寥廓山市人家翠疊重
病起不論雙足繭層巔更欲試詩筇

次韻田園居

帶郭林塘儘可居，
秫田雖少不如歸。
荒烟五畝竹中半，
明月一間山四圍。
草卧夕陽牛犢健，
菊留秋色蟹螯肥。
園翁溪友過從慣，
怕有人來莫掩扉。

次韻間中

玲瓏壓轡繫絨鞍，
付與詩人洗眼看。
老子只憑雙脚健，
梅花相對一溪寒。
吾用焉往不三黜，
此樂未央并四難。
併與竹間孤鶴語，
倦飛底用插脩翰。

牛庵睡起

自束生芻起飯牛隔林扣角更深幽半分不得詩書力
一飯常存畎畝憂老去有腸堪貯酒生來無骨可封侯
開荒厓下田無幾種秫寧須與婦謀

牛庵後古松五株

山中老子一間屋屋後秦人五大夫丘壑得專間日月
衣冠甚偉古眉鬚計今當是百年物着我添成六老圖
已有茯苓巢可俯待烹石鼎療詩癯

竹下

松陰竹影當行窩日日扶筇一再過與世無求干牘少
對人可語笑談多一夔一契付公等某水某丘如我何
歲晚只愁年穀盡祀其母棘菊毋莎

山行

野鶴相將拄杖前倚松穿竹各欣然山行一匝又一日
雲作四鄰今年名教之中元有地吾心以外別無天
平生老僕猶疑我不是凡夫不是僊

山中

久無筋力踞虬龍
西嶺東塘漫倚筇
白練帶隨紅練帶
木夫容並水夫容
寧消幾兩生前屐
忽憶當年飯後鐘
孤負草堂今夜月
徑眠誰與吐奇胸

其二

解纓聊復濯滄浪
晞髮松陰蘚石床
有味是貧琳館俸
無功於懶玉函方
自參老子鼻端白
未羨諸公腰下黃
蔗境漸佳惟習靜
筆床茶竈併荒唐

其三

已付身心畢竟空
念頭了不到窮通
既愚寧免日三省
是聖未妨時一中
物外禽魚相爾汝
生前烏兔幾西東
誰云雙手都無用
自種山田歲便豐

探梅

穿林傍水幾平章
合有春風到草堂
自入冬來多是暖
無尋花處忽聞香
枝南枝北一痕月
山後山前兩履霜
直看過年開未了
醉吟且放老夫狂

梅邊約客

昨日今日雪欲落一梢兩梢梅正開攜壺野亭醉復醉
折簡故人來不來山翁意重百金值俗士面有三寸埃
臨風歎息重歎息玉飛片片相徘徊

與客觀雪

鶴帳竒寒被欲冰開門千嶂雪崢嶸頻年無此豐年玉
一夜移將不夜城富貴園林行樹密模糊水墨畫圖橫
與詩小住為佳耳莫管梅花太瘦生

再和

未怕風威酒亦冰
憑虛吞以氣崢嶸
何人出此六奇計
我輩賢於五字城
松壓釣蓑銀獨速
麥分碁局玉縱橫
自然石鼎煎魚眼
解致鄒枚漢兩生

三和

肺渴初供醒酒冰
又思攜客上崢嶸
十分宇宙無塵事
一色瓊瑤是化城
病起未堪論斗醉
詩狂且莫到參橫
剡溪可是忙回棹
凍合琉璃作麼生

次韻梅花

歲晚何人肯卜鄰
梅於我輩最情親
兩山盡是經行處
一雪不知多少春
先後花隨人意思
橫斜枝寫月精神
寒香嚼得成詩句
落紙雲烟行草真

其二

雲藏山塢塢藏梅
春意適從何許來
天與此翁娛寂寞
日攜扶老上崔嵬
草堂須小難為客
霜月正高誰與杯
分上下番開自好
登臨且莫遣詩催

次韻鄭總幹

底須咄咄漫書空未覺人間欠此翁黃犢自隨諳寂寞
青山亦諱話窮通人方怒及水中蟹我亦冥如天外鴻
醉眼不知人幾品久將樵牧等三公

其二

我亦思今天一涯樊川詩老此曾家九夫容隔秋風浦
一獨速眠春雨蛙竹屋有燈誰與共秫田可釀不須賒
何年又賦高軒過豆粥猶能辨咄嗟

其三

過從一笑酒瓶空不是樵翁即釣翁
偶種竹成俱崛強
旋移花活尚神通
前身已化歸遼鶴
醉帖猶傳戲海鴻
新貴少年吾自老
世間白髮幾曾公

其四

蟻丘得喪事無涯
冷眼難瞞老作家
公等功名千里馬
山居鼓吹兩池蛙
牛羊野逕通村近
虎豹天關去國賒
本是秋風釣竿手
故吾猶在復何嗟

宿多景樓奉簡吳總侍

客懷孤倚夕陽樓
烟老平蕪岸岸秋
往事六朝南北史
晴江一片古今愁
慨其嘆矣山吞吐
何以醕之酒拍浮
此意政須諸老共
容分蘆雨寄漁舟

書戴式之詩卷

石屏遊諸老間蚤得詩名又蚤諸老凋謝獨石
屏巋然魯靈光耳予生後三十二年纔此一識
秋風別去因書數語集中

七十行年戴石屏同時諸老各凋零扁舟歸去自漁舍
冷骨秋來更鶴形天地無情頭盡白江山有分眼終青
剡溪定有人乘興月下柴門不用扃

石孫受命

聖澤如春雨露寬棄遺猶不絕衣冠萬釘寶帶翁無分
一幅花綾孫有官得免白丁何啻足親曾黃甲不堪看
九經幸自瀾翻熟但守青燈雪屋寒

答趙玉汝

人間無處不風波，潮打西興雨一蓑。難與命爭俱老矣，
徑尋詩去奈吾何。園成次第自花草，山是知聞空薜蘿。
賴有月明千里共，烟寒數筆落行窩。

夢陳和仲如平生交有三言覺而記其一曰錯
後亂夢中了了以為事錯之後此心撩亂不如
早謀其始也

睡殘寒月海東頭，不起斯人孰與遊。天下事寧堪幾錯，
夢中語亦借前籌。江湖浩浩二三子，風雨寥寥十五秋。

莫向斷雲多感慨
孔顏無命不伊周

夢余義夫以劍請銘

黑水梁州百二關
青天蜀道古云難
貔貅夜柝身何在
麋鹿秋風骨未寒
寵辱可驚漚起滅
荒涼只有月悲酸
崩緜忽墮空山夢
不道幽人意轉關

次韻費司法

有客誰為數擊鮮
西風孤我雁聲前
酒無多酌何如醒
詩不能竒莫浪傳
秋色淡於人寂寂
桂花香得月娟娟

五經不到山翁腹且聽便便引老邊

其二

山居未省佩弦韋緊閉柴扉不問誰自釣鱖魚西塞雨
久盟猿鶴北山移古今不遇豈惟我宇宙無窮付與詩
直道背時寧敢爾白雲深處要耘芝

其三

空谷跼然餘故人且談風月未論文長房僊去幾何日
陸羽泉邊多少雲誰向唐詩參白律只將周易對爐熏

縱無今古飛談屑稼穡平生亦飽聞

次韻滕和叔投贈

猶及溪齋識老成萬琅玕外一溪清諸郎與我雪燈共
兩眼觀書霜月明二十一年如夢過五三六籍尚誰賡
鹿車忽到蒼厓底老木驚秋亦向榮

其二

白髮相過各暮年顏間老氣自軒軒滄浪供硯心猶在
博雅藏書手自翻舉世共知名父子此身莫負晦翁門

重陽風雨何堪別只和名章當贈言

觀諸弟子射石孫七齡亦能二十步四十的

飽聞吾季藝穿楊試手春風百步彊赤白羽飛低日月
東西朋立凜冰霜共觀棲鵠如環堵亦笑童烏敢擅場
莫計草間狐兔盡關河久已失耕桑

次韻汪宰見寄

行行驄馬効蒼豪叱叱黃牛倦作勞窮則有餘名迹在
言之無作語聲高誰求封禪家徒壁自謂羲皇人似陶

見說醉鄉天地濶此生聊向此中逃

其二

半世青燈眼欲昏誰知曾亦望中原
雨荒塞草秋如洗雪擁春蓑夜自溫
寵辱易生分別想是非政可鶻菴吞
不論茅屋鋤犁外但守平生六二坤

石孫試童子郡廣文贈之詩代賡為謝

不緣青紫不明經科目多慙舊兩生
三豕魯魚曾未學一螭蠻觸已爭名
棟梁材欲丘山重滄海珠遺星斗明

未必童烏能辨此乃翁先已荷陶成

其二

命窮久已付之天草木間兮月一川無地可容攜鍤處
有孫猶在佩觿年老夫耄矣耕方熟小子識之攻益堅
萬歲石田今爾耳當家衣鉢底須傳

次韻胡兄

釣菴烟雨斷磯頭戀闕丹心付子牟腹有一丁長作祟
背無三甲不封侯慣貧已識山林趣投老空從造物遊

自笑骨寒癯似鶴，忍飢猶未怯茶甌。

其二

猿驚鶴怨老江蘼，留得離騷到景差。愚智共知窮有分，浮休俱與醉無涯。人間狡兔自三窟，身外鷓鴣只一枝。非意相干吾豈敢，年來端為冷蘂吹。

輸棋

半嶼山雲舊草堂，鳥啼花落幾平章。酒無賢聖同歸醉，風有雌雄各自涼。賴與鷗盟同保社，不隨蟻垤夢侯王。

未償詩債逢棋敵誰信閒人最得忙

次韻劉簿禱雨西峰

句律清圓蚌剖胎斷無塵土到靈臺開張九虎排雲入
約束五龍驅雨來造物無私心感動太平有象筆追回
焚香小待生呈物未放青天萬里開

其二

愛民端與共胞胎消得黃金為築臺一道香烟隨牒去
五更風雨入詩來雪燈字暗心猶在霜葉衫枯首獨回

氣格老蒼能過我柴門不厭為君開

感懷

獨擅松風一壑哀竹門雖設為誰開宦情已矣隨流去
老色蒼然上面來已慣山居無歷日不知人世有公台
天生此手終何用只解持杯亦快哉

其二

三十年前氣挂天老來身世竟茫然窮愁正坐識丁字
生事不聊稱子錢得見古人千載上已忘今我一漚邊

劉伶墳上寧須酒併與聲名不用傳

其三

異人曾授相牛經竒字初傳瘞鶴銘敲月不知僧某甲
鋤烟賴有老畦丁山靈呵護閒居賦象緯森羅處士星
俯仰中間無愧怍芋區瓜隴亦朝廷

其四

去國何年老一丘於今已換幾公侯不知我者謂為拙
是有命焉那用求舴艋舟應容釣蟹麒麟閣不畫騎牛

百年長短身餘幾付與西風汗漫遊

其五

野壙風高一欠伸平生俯仰已成陳
老天無意獨窮我直道有時能誤人
悔不可追身是膽怒何堪觸腹生鱗
忍飢罷乞祠官祿只麼扶犁亦幸民

其六

非干寵辱不能驚一付之天莫我撓
舉世忙時贏得懶是人愛處放教輕
生為柱國身何在死象祁連冢亦平

千古在前兒戲耳且容高枕聽秋聲

其七

從古幽閒在澗阿不將齒髮犯風波共知韓愈亦人耳
子謂伯寮如命何野處生成盤谷序襟期寫在醉時歌
尚嫌山淺人知處更與移床入薜蘿

其八

拄入風烟更一層瘦藤對倚玉峻嶒左花右竹自昭穆
春鶴秋猿相友朋五畝園為終老計半間雲住在家僧

蹲鴟生孺菰如臂莫道山翁百不能

其九

四壁空空長物無松風之外復何須竹夫人爽夜當直
木上座臞新給扶老去雲山空跌宕秋來風月不支吾
何人能敗吟詩興自在成章不欠租

其十

曩昔行藏已熟籌最為上策是無求看人面孔有何好
如此頭顱只麼休草草園廬山北住匆匆歲月水東流

莫因一片梧桐葉瘦損能詩沈隱侯

山居

春溪甘滑漱山瓢歸卧藤陰蘚
遙雲氣釀成巫峽雨
松聲寒似浙江潮書生與世例迂濶
山意向人殊寂寥
却喜庾郎貧到骨
韭畦時一摘烟苗

次韻行甫小集平山

不奈花時兩手閒
共攜詩硯對孱顏
江南江北音書外
春去春來楊柳間
騎鶴重尋烟雨句
征鴻欲沒夕陽山

百年風物一杯酒歎息人間兩觸蠻

再用韻

春風多可幾曾閒又為平山入醉顏流恨不窮江萬里
與翁長在月三間半清半濁聖賢酒似有似無烟雨山
試問黃鸝相識否綠陰深樹自綿蠻

三用韻

一片花飛不等閒對花空手亦何顏醉鄉別在乾坤外
詩社寧容季孟間妙句屢移青玉案佳遊仍隔小金山

只應江上烟霏笑蠻府參軍語自蠻

四用韻

欲將春睡了春閒誰遣楊花點暮顏
世事不如眠白墮
人情何啻抵黃間
茫無措手中
句悔已噬臍
山外山
蚤晚定編長慶集
併教傳寫落烏蠻

五用韻

客愁聊以酒防閑
非復春風桃李顏
北里未忘諸老在
中興已是百年間
非無烟雨無奇語
自有乾坤有此山

楊柳豈知興廢事夕陽依舊舞腰蠻

次韻潘令君訪予半村

鋤烟荷雨自村村不慣高車入里門石老只堪麋鹿伴
山寒未放蝶蜂喧欲分桃李春何限共話桑麻道轉尊
但得諸公如卓魯晚菘早韭且窺園

再用韻

終須西塞老漁村抵用南昌隱市門時序略如飛鳥過
世終何啻聚蚊喧竹其安否六太息梅自癯然三可尊

貧味却愁兒輩覺未妨壁立病文園

三用韻酬諸文

家在江南黃葉村歸來重葺柳邊門溪雲排闥硯猶濕
山溜通池水自喧但得梅花容著語無煩桃葉為開尊
逢迎車馬荷衣老面目何堪向綺園

四用韻才老

江山帶郭數家村窮僻誰敲月下門謝絕往來緣事盡
爭論勝負為棋喧愛閒寧有萬金產投老當誇兩足尊

不惜梅花三寸雪併令回施給孤園

勸耕

郡如斗大亦何堪耕雨鋤烟亦飽諳共話桑麻真有味
久拋蓑笠得無慙野田春水自深淺晴日鳥聲時兩三
安得一牛橫短笛南山之北北山南

其二

歸與我亦耦耕人麥隴桑畦意自親纔出郭收連日雨
已拚花負一年春農安用勸村村急文不須工字字真

自是非材頭白盡不緣方寸在吾民

熙春臺用王薄韻

共攜社甕上春臺踏破綠雲一徑苔歲月略如飛鳥過
賓朋不為看花來霜前老翠依然在眼底凡紅不用開
未害慳風相料理放遲歸與月徘徊

又用胡尉韻

便覺尋春負一籌老懷無復少時遊荼桑天似鵝黃酒
楊柳花飛狐白裘試問獨醒觀衆醉何如一笑失千憂

不知多少人間事付與溪聲自在流

別陳尉

市橋晴柳拂朱旗天際九華勞夢思灘鷓灘深猶昨日
鷓鷯杓醉復何時微官梅隱亦風度寒食梨花更別離
蚤晚暮雲春樹底烹魚倘有入京詩

寄別參政

一見懼仙眼為清寒温未了與談經有書欲問文中子
無策重窺傳說星馬瘦不妨吟下澤鶴歸寧復啜華亭

獨於知己難忘在投老殘編儻乞靈

次韻王尉賀雨

老天自不負吾君誰向靈均三沐熏鶴立待收連夜雨
龍歸看帶入山雲摩挲一飽豈易得愁嘆多年不忍聞
亦欲買牛橫短笛華山一半倘容分

觀稼西庵用文懿壁間韻

太平只是豐年做山雨不休公出遊捲野晴雲堆作堵
翻匙香雪滑如流人行黃犢夕陽外詩在丹楓古渡頭

老我無田歸自種可憐鶴怨賈胡留

禱晴

曾幾何時屢乞晴爐烟未斷已收聲
天於老子亦多可
國有豐年方太平風土不堪人佩犢
月明無復夜啼聲
及今便可歸田去牛背斜陽一笛橫

聞罷

面骨巖稜不入流放歸何止四宜休
束書自可供兒讀
斗酒聊須與婦謀舊藁如山應有誤
老夫於世本無求

一犁春雨平生事莫與諸公作話頭

報具闕

百不如人且罷休又攜書冊上孤舟歸歟雅有一黃犢
愧甚向來雙白鷗但得濁醪供燕社不妨明月老菟裘
研冰自補山人處莫為區區費廟籌

得歸

日日言歸始得歸歸歟好在舊牛衣青山未害欠詩屋
白鳥倘能看釣磯欲問古人今在否不知吾道是耶非

里中父老如相過應嘆艱難帶解圍


山行漫興

野性惟便水竹居老來自覺轉迂疎圖書四壁飯不足
烟雨一犁春有餘紙上古人俱已矣山中今我定何如
春風獨立鳥聲碎不是言詩亦起予

次韻雨阻遊人

村塢花飛片片紅橫遭澁雨又慳風無何春事三分過
不肯遊人一笑同窮勝園林惟我輩儻來軒冕付諸公

烟雲一屐亦堪醉莫問聖賢時一中



秋崖集卷六